

Cörta tli San Pöblo ca ujpa oquemejcuelle **CORINTIOS**

¹ Naja nePöblo, que neca netlateotitlantle de Cristo Jesús, ipampa ejqueu quenequihuaya Deus. Naja ca tocni Timoteo nemiechejcuellefa ini nönca cörta para nemejua tli nencate de inu grupo de creyentes ompa Corinto, hua para innochtie tli yecteque cate ipa noche nemoestado de Acaya.

² Deus toTajtzi hua Tlöcatzintle Jesucristo ma nemiechmomeyaquelicö tieinfavur hua neyulsiebellestle.

Quiene oquesufriro Pöblo

³ Ma tetieyectieniehuacö Deus tieTajtzi de toTlöcatzintle Jesucristo. Pues yejuatzi iloac Tajtle hua por inu tiechpililus tietlöocoltelestle, hua iloac Deus hua por inu seme cuale tiechyulölisque.

⁴ Yejuatzi iloac öque tiechyulölilo ipa noche tli tecsufriroa. Ejqueu tejua cuale tequenyulölisque niecate tli nuyejque quesufrirojtecate, ipampa tejua nuyejque ye tiechyulölisque Deus.

⁵ Pues tecpejpea bieye pörte ipa tiesufrimientos de Cristo, hua ejqueu nuyejque tecpejpea tieca Cristo bieye tlayulölelestle.

⁶ Por inu cuöc tejua tecsufriroa, ica para que nemejua nemoyulölisque hua nenquepeasque nemöquextelestle ipampa tejua tecsufriroa. Hua cuöc Deus tiechyulölilo, ica para que nemejua nuyejque nemoyulölisque hua ejqueu cuale

nenquexicojtasque cuöc nenquesufrirusque quiename tejua tecsufrirojtecate.

⁷ Hua tecate seguros de que nemejua nenquisasque cuale. Pues tecmajmate que ejqueu quiename nenquepejpea pörte ipa sufrimientos, ejqueu nuyejque nenquepea pörte ipa inu tlayulölestle.

⁸ Tocnihua, tecneque ma xecmatecö quiene oyeya inu sufrimientos tli topa onhuöla cuöc teyejyeya ompa Asia. Pues oyeya lalebes checöhuac, que ayecmo tecbejbeleteya para tecxicusque, hua hasta tecpensöroöya que de mölas temejmequesquiöya.

⁹ Tomacheliöya quiename tlö teyene tecuntenödos para temequesque. Pues ini nönca otiechmachte que majcamo tectlölicö toconfiönsa ca tejua mismo, tlöcamo tieca Deus, öque quenyulebitilo mimejque.

¹⁰ Pues yejuatzi iloaya öque tiechmöquextejque de inu mequelestle san tiemajte. Hua oc turavea tiechmöquextisque. Pues tecpea confiönsa tieca yejuatzi que oc turavea tiechmöquextisque,

¹¹ tlö nemejua nentiechtlamachpaliebisque ca nemotlötlajteles. De inu maniera, Deus tiechteochihuasque por nemotlötlajteles, hua ejqueu tejua hua nemejua hua ocseque tocnihua tonochtie tetietlasojojcömatelisque toDeus.

Tlica amo unya Pöblo ca Corinto

¹² Pues tomachelea que cuale tecate. Pos tecmate ipa toyulo que ca noche gente, hua especialmente ca nemejua, toportörojque ca cuale, hua amo ca ume toxöyac. Pues ejqueu quenequi-hua Deus ma tecchihuacö. Toportörojque ejqueu

ipampa Deus tiechpaliebiluc, amo porque tejua lalebes tecmajmate.

¹³ Pues tocörtas tli nemiechejcuelfea amo tlajtoa de ocseque sösantle, tlöcamo sa de lo que tli cuale nenquetlajtultisque hua cuale nencasojcömatesque.

¹⁴ Hua necneque ma seme xecasojcömatecö ini nönca que ye nencasojcömate ölgo, que nemejua nenpajpöquesque por tejua ipa inun tunale cuöc hualiloas toTlöcatzintle Jesús. Hua ejqueu mismo tejua tepajpöquesque por nemejua.

¹⁵ Necpeaya ini confiönsa ca nemejua, hua por inu onecnec neyös ca nemejua, para que ca ujpa nemiechpaliebis cuöc nemiechtajpalus.

¹⁶ Hua desde Corinto, cöne nencate nemejua, neyösquiöne hasta necö ipa Macedonia, hua occajpa nocuepasquiöne ca nemejua, para que nemejua nenniechtlanesquiöne ca cuale ipa noojfe para Judea.

¹⁷ ¿Quie beles amo necpensöro cuale cuöc necchihuasquea ini nönca? ¿Quie beles nenquepensöroa que cuöc nequejtoa que necchihuas canajyetla, necchihua quiename quechihua ocseque tlöca, para que nequejtus “Quiema, quiema”, pero sötiepa nequejtus que “Amo, amo”? Amo, nocnihua.

¹⁸ Deus amo iloac de ume tiexöyac, hua por inu tejua amo nemiechelfea “quiema” hua sötiepa “amo”. Amo ejqueu, nocnihua.

¹⁹ Pues por medio de tejua, por naja hua Silvano hua Timoteo, nemejua nenquecajque inu mensöje de tieConietzi Deus, Jesucristo. Hua yejuatzi amo iloac quiename niecate tli quejejtoa “quiema” hua

sötiepa “amo”; cache yejuatzi seme cafirmöruro que “quiema”.

20 Porque noche tiepromesas de Deus tli onca, yejuatzi quemafirmöruro ca sente tlajtule de “quiema”. Hua ejqueu por medio de yejuatzi tejua nuyejque tequejtusque “Amén, ma ejqueu iye”. Ejqueu tetiechamöhuasque Deus.

21 Hua Deus iloac öque tiechchihualtilo para ma toucujpetzotjaco tejua hua nemejua nuyejque, para majcamo topatlaco de toneltoqueles tieca Cristo. Hua yejuatzi otiechixpejpenque,

22 hua nuyejque otiechseyörojque hua tiechmacaque tieEspíritu Sönto ipa toyulo quiename sieñas de lo que tli sötiepa tecselisque.

23 Tlö amo oneya ca nemejua ompa Corinto, netietlölea Deus quiename testigo de que onecchi para majcamo nemiechmaca yulcocoolestle. Hua tlö cana amo melöhuac, ma nemeque.

24 Amo quejtsneque que tecpensöroa que tecpea deriecho de tetlamandörusque de nemoneltoqueles, cache tecnejneque nemiechpaliebisque para nенquepeasque cache meyac pöquelestle. Pues ye cuale nencate de nemoneltoqueles.

2

1 Yaja por ini nönca onecdesediro de que amo onocuec ca nemejua ca yulcocoolestle.

2 Porque tlö nemiechchibelea ma xomoyulcocucö, ¿öquenu noso niechpöctis? Solamente nemejua, tli ye nemiechchibele ma xomoyulcocucö.

3 Por inu onemiechejcuelfe inu sösantle, porque amo necnequeya neyös para nenniechchihualtisque ma noylcoco, pues

cache conbenierebe ma xeniechpöquelesmacacö cuöc neya nemotlac. Hua necpea confiönsa ca nemejua, de que cuöc naja nopöctea, nuyejque nemejua nemopöctea.

⁴ Pues cuöc nemiechejcuelle inu cörta, notequepachoöya lalebes hua noyulcocoöya, hua hasta nechucaya. Pero amo nemiechejcuelle para que nemoyulcocusque, tlöcamo para nenquematesque que lalebes bieye tlasojtelestle nemiechpilea.

Ma queperdonörucö öque oquechi mal

⁵ Pero inu tlöcatl tlö otiechchihualte ma toyulcocucö, amo tönto niechyulcoco naja, tlöcamo cache meyactie de nemejua nemiechyulcoco. (Nequejtoa que “meyactie” para amo nequejtos que nemonochtie.)

⁶ Cuöc nemosentlölejque hua nentlavotörojque para nenquecastecörojque, ye nenquemacaque suficiente icastigo.

⁷ De manieras que öxö cache conbenierebe ma xecperdonörucö hua xecylölicö, para majcamo iye que por inu bieye yulcocoolestle hasta motlabejbicaltis.

⁸ Por inu nemiechtlötlajtea, xecdemoströrficö osajpa que turavea nenquetlasojtla.

⁹ Pues nemiechejcuelle inu cörta nuyejque para ini nönca, para nemiechprobörus hua necmates tlö nenqueneltoca noche tli nemiechejcuellea.

¹⁰ Pero tlö nemejua nenqueperdonöroa canajyeca por canajyetla sösantle, naja nuyejque necperdonöroa. Pues ye onecperdonöro (tlö cana niechtocöroa necperdonörus). Onecchi tieixpa Cristo por nemopampa nemejua,

11 para majcamo tiechxexico inu Satanás, pues tecmajmate cuale de imöñas.

Motequepachoöya Pöblo ipa Troas

12 Bieno, pues, onaseto ipa ciudad de Troas, hua toTlöcatzintle niechmacaque locör para netlanunutzas de inu cuale tlamachestelestle de Cristo.

13 Pero notequepachojtöya ipa noyulo porque amo necponteles tocni Tito. Por inu nodespediro de yejua hua onehuöla necö ipa Macedonia.

Tiemachesteles Deus macheateca ipa noche locör

14 Pero ma tetietlasojojcömatelicö Deus, pues ica quiename tlö seme tiechbicaloteneme ipa sente desfile de tietlatlönëles de Cristo Jesús. Hua ejqueu tlamachestilo por medio de tejua de inu machestelestle tli tlajtoa de yejuatzi. Ejqueu inu machestelestle macheateca ipa noche locör. Ica quiename cuöc ajfeyoc potune ca nobeyo.

15 Pos tejua tecate quiename inu ajfeyoc tli quecualejtaló Deus, ipampa de Cristo *tecate. Hua tepotuntecate entre tli momöquextejtecate hua nuyejque entre tli ixniempolejtecate.

16 Para niecate tli ixniempolebe, inu tli potune yebitz de mequelestle hua quenmöpiehua hasta ipa mequelestle. Pero para noche tli momöquextea, yebitz de nemelestle hua quenyecöna hasta ipa nemelestle. ¿Öquenu noso cuale beletes para quechihuas nönca toteque?

* **2:15** Cuale nuyejque motradusirus: “tetlanunutza”.

17 Pos tejua abele tecchihuasque quiename quechihua Meyactie ocseque. Pos yejua quenelulta tietlajtultzi Deus ca ocseque sósantle. Cache tejua tetlajtlanunutza ca tli melóhuac ipa toyulo. Tetlanunutza lo que tli tiechelfejque Deus. Tecchihua quiename tegiente de Cristo, porque tecmájtecate que Deus quetztaluteca tli tecchihua.

3

Mensöje de yancuec acuierdo

1 Cuöc tequejtoa ini nönca, ¿quie beles nenquepensöroa que ocsajpa tepiehua toyectieniehuasque tejua mismos? Noso ¿beles tecnesesitöra sente cörta tli tiechrecomendörus ca nemejua, o noso sente cörta tli nemejua nenquejcuelusque, tli tiechrecomendörus ca ocseque? Pos ocseque quenejnesesitöra inu cörotas, pero tejua amo, tocnihua.

2 Pues nemejua nencate quiename inu cörta para tejua, tli omojuelo ipa toyulo, que quemajmate cuale hua cuale quetlajtultisque noche giente.

3 Cuale quejtasque giente que nencate sente cörta tli Cristo oquejcuelojque por medio de tejua. Amo omojuelo ca tinta, tlöcamo ca tieEspíritu de Deus öque nemoateca. Amo icaca quiename inu ley tli omojuelo ipa tietetu manque, cache ini cörta Deus oquejcuelojque ipa toyulo tli yulejteca.

4 Hua tecate seguros de que tecchihuasque cuale ini nönca tequetl por medio de Cristo, pues tecpejpea ini nönca confiönsa ca Deus.

5 Pues tejua amo tecpejpea beletelestle por tejua mismo, para que ejqueu tequejtusque que tejua

mismo otecchijque canajyetla; tlöcamo cache to-beleteles yebitz de Deus.

6 Hua yejuatzi tiechmacalo beletelestle para tetequetesque de tetlanunutzasque de inu yan-cuec acuierdo. Inu yancuec acuierdo amo ica de que öque queneltocas san quiene ca tlajcuelulpanca, tlöcamo ica de tieEspíritu de Deus. Porque inu acuierdo de lo que tli tlajcuelulpanca quen-bica giente ipan mequelestle, pero inu tieEspíritu de Deus quetiemacalo nemelestle.

7 Hua inu ley de Moisés, tli omojculo ipa tietetu manque, ohuöla ca tlaniextelestle, hasta que inu israelitas abele oquetztaya ixöyac Moisés ipampa inu tlaniextelestle, mösque ye oquecöjtöya itzotlöneles. Entunses tlö ejqueu quepeaya tlaniextelestle inu tequetl tli quebicatz mequelestle,

8 cache ca meyac arrasu quepea tlaniextelestle ini tequetl tli ica de tieEspíritu Deus.

9 Tlö inu tequetl tli quencuntenöroa giente quiename tlajtlaculteque quepeaya tlaniextelestle, pos cache ca meyac arrasu quepea meyac tlaniextelestle ini tequetl tli quemelfea que Deus cuale quenselisque quiename yecteque.

10 Pues melöhuac, inu tli oyeya quepeaya tlaniextelestle, pero öxö niese amo quepea tlaniextelestle cuöc tequetztecate ini tli cache meyac tlaniextelestle quepea.

11 Pues tlö inu tli sa opanusquea quepeaya tlaniextelestle, cache quepea tlaniextelestle lo que tli mocöhusas.

12 Bieno pues, tecpejpea ini nemöchealestle, hua

por inu tetlajtlanunutza ca meyac confiönsa.

¹³ Amo tecchihua quiename oquechi Moisés, pos yaja mixtlapachoöya ca sente tzojtzomajtle, para majcamo quetzacö inu israelitas hasta cuöc otla inu tlaniextelestle tli panutaya.

¹⁴ Pero *yejua amo oquenejque cajasojcómatesque; pues turavea hasta öxö, cuöc quetlajtultea inu tlajtule de Antiguo Testamento (quejtusneque de inu acuierdo tli primiero oyeya) icaca quiename tlö oc turavea inu mismo tzojtzomajtle quemixtlapachojteca, hua amo mojcuenejteca, porque amo quemajmate que mojcuenea solamente por Cristo.

¹⁵ Cache hasta öxö, cuöc quetlajtultea tli oquejcuelo Moisés, quiename sente tzojtzomajtle quemixtlapachoa innenebeles.

¹⁶*Pero cuöc mocuepa ca Tlöcatzintle moquextelea inu tzojtzomajtle.

¹⁷ Hua inu Tlöcatzintle iloac yejuatzi Espíritu Sönto. Hua cöne iloac tieEspíritu Tlöcatzintle, cate libres gientes.

¹⁸ Por inu icaca quiename tlö tejua tonochtie ayecmo tixtlapachojtecate para ejqueu *cuale tequetztecate tietlaniexteles Tlöcatzintle, quiename tlö ipa sente tiescatl. Ejqueu topatlabe cache hua cache para teyesque quiename yejuatzi, porque tecpextebe tietlaniexteles cache hua cache. Yaja ini nönca lo que tli tiechchihualtilo

* **3:14** Cuale nuyejque motradusirus: “Deus oquenchihualtejque majcamo casojcómatecö”. * **3:16** Xomojtelicö Exodus 34.34

* **3:18** Cuale nuyejque motradusirus: “tecate quiename sente tiescatl cöne cuale öque quejtas tietlaniexteles Tlöcatzintle”.

Tlöcatzintle öque iloac Espíritu.

4

¹ Bieno, pues, tecpejpea ini nönca tequetl, ipampa Deus tiechpilejque tietlöocoltelestle, hua por inu amo todesanimöroa.

² Cache cuale ye otejcöjque inu sösantle tli giente quechihua sa ichtacajtzi, de tli öque mopejpinöjtea. Amo teyajyajteneme ca möñas, nimpor amo tecpatla tietlajtultzi Deus para tequencajçayöhuasque giente. Cache cuale tecpejpetlöhua cuale lo que tli ica melöhuac. Tecnejneque ma ejqueu noche gientes ma quemachelicö ipa inyulo que tequejtoa tlin melöhuac tieixtla Deus.

³ Hua inu cuale tlamachestelestle tli tetlanunutza, tlö cana tlapachojteca, solamente tlapachojteca para niecate tli ixniempolejtecate.

⁴ Porque inu Amo Cuale Tlöcatl, öque ica deus de nönca tlöltecactle, yaja quemixcocoxcöjtele innenebeles de yejua tli amo moneltoca. Ejqueu oquechi para majcamo impa tlaniexte inu tlöbile que yaja inu cuale tlamachestelestle tli tiechelfea de tietlanieexteles de Cristo, öque iloac belaja tieixniehualo Deus.

⁵ Pues cuöc tetlanunutza, amo tetlanunutza de tejua mismos, tlöcamo tetlanunutza de Cristo Jesús. Tequejtoa que yejuatzi iloac Tlöcatzintle, hua que tejua tecate tetlatequepanojque de nemejua porque tetietlasojtla Jesús.

⁶ Pues tecmajmate que Deus, öque oquejtojque: “Ma tlaniexte tlöbile de ijtec tlajtlayohuaquelestle”, yejuatzi iloac öque tiechtlaniexteliluc ipa toyulo. Pos tiechmacaque inu tlöbile que yaja inu

machestelestle de tietlaniexteles Deus, tli tequejta cuöc tetieyejta Cristo.

“Toneltoca, hua por inu tetlanunutza”

⁷ Inu machestelestle ica quiename sente tesoro de ricojyutl, hua tejua tecate quiename xocme de tapalcatl tli amo cuajcuale, tli ijtec inu xocme tecpejpea inu tesoro. De inu maniera noche gente quematesque que inu meyac checöhualestle yebitz de Deus, hua amo de tejua.

⁸ Ejqueu tecpejpea meyac problemas ca nobeyo, pero seme cuale tequisa. Amo tecmate quiene tequisasque, pero amo todesanimöroa.

⁹ Giente tiechtoca para tiechasesque hua tiechmectisque, pero Deus amo tiechcöhualo. Giente tiechtlajcale, pero amo tiechmectea.

¹⁰ Ca nobeyo ca cöne teyabe icaca quiename tlö niese totech tocuierto tiemequeles de Jesús, para que tienemeles Jesús nuyejque cuale öque quejas itech tocuierto.

¹¹ Porque tejua, mös tenejneme, seme tiechmöctea para temequesque tiepampa Jesús. Ejqueu mochihua para que cuöc Deus tiechmöquextisque de inu peligro, giente quejasque totech que Jesús nemoateca, mösque sótiepa meques nönca tocuierto.

¹² De manieras que mequelestle totechca, pero nemelestle ica nemotech nemejua.

¹³ Pero tejua toyulo moneltoca, san quiene ca moneltocaya iyulo de inu Salmista. Pos tlajcuelulpanca: “Noneltocac, hua por inu onetlanunutz”. Ejqueu tejua nuyejque toneltoca, hua por inu nuyejque tetlanunutza.

14 Pues tecmajmate que yejuatzi öque tieyulebitiluc toTlöcatzintle Jesús nuyejque tiechyulebitisque tejua tieca Jesús. Hua tiechbicasque tejua hua nemejua nuyejque, hua tiechtlölisque tieixtla yejuatzi.

15 Pero noche ini nönca sösantle icaca para nemejua, para que cache meyactie nenqueselisque cache meyac tiefavur de Deus. Hua de inu maniera cache nentietlasojcömatelisque ipampa tiechmacalo tiefavur. Hua ejqueu yejuatzi cache quepeasque yectieniebelestle.

16 Por inu, amo todesanimöroa, pues melöhuac tlante ini nönca cuierpo tli cuale öque quejas. Pero ipa toyulo toyancuelejtebe cöra tunale.

17 Pues lo que tli tecsufriroa ipa ini nönca nemelestle amo bel checöhuac ica hua isejco pano, pero tiechbiquelitz lalebes bieye hua checöhuac tlaniettelestle, tli nochepa mocöhuas.

18 Hua amo tofijöroa ipa sösantle tli cuale öque quejas, porque inu sösantle sa pano, pero lo que tli amo niese semejcac mocöhua.

5

1 Pues tocuierto icaca quiename sente xajcale cöne techönte necö ipan tlöltecptacle. Hua tecmajmate que tlö cana xexetunes tecpejpea sente cale ompa elfecac tli Deus tiechmacasque. Hua inu cale amo quechejchijque tlöca, tlöcamo yecchejchijteca cuale, hua mocöhuas semejcac.

2 Pues melöhuac mientras techajchöntecate ipa ini nönca tocuierto, tecuejcuesebé hua teyelsesebe ipampa lalebes tecnejneque ma

motlaquente nönca tocuierto ca inu cuierpo tli yebitz de elfecac.

³ Pues *cuöc ye totlaquentejque ayecmo quiema teyesque sa yejque.

⁴ Pues mientras techajchöntecate ipa ini nönca xajcale, teyelsesebe porque tomajmösebea. Amo ica que tecnejneque toquextelisque nönca cuierpo, tlöcamo tecnejneque tectlölisque inu ocsente cuierpo, para que ini tli sa tlame hua meque pojpolebes hua tecpeasque tocuierto tli nemes nochepa.

⁵ Hua Deus iloac öque otiechchibejque para tecselisque inu cuierpo yancuec, hua tiechmacaque tieEspíritu quiename sieñas de que seguramente tecselisque.

⁶ Por inu tanimöra. Tecmate que mientras techönte ipa tocuierto necö amo tecate ca toTlöcatzintle.

⁷ Porque öxö tenentecate ca toTlöcatzintle sa por medio de toneltoqueles; abele tetieyejta ca toxitelolojua.

⁸ Bieno pues, tanimöra, hua tecnejnequesquiöne tejcohüasquea nönca chöntle tli yaja tocuierto para ejqueu teyesque ca toTlöcatzintle.

⁹ Por inu, lo que tli seme tecnejneque ica ma Deus quecualejtacö totlachihual, ya sea cox tenentecate ipa tocuierto noso cox ayecmo.

¹⁰ Pues tonochtie tecpejpea que teyesque tieixtla inu tlajtoöne que iloac yejuatzi Cristo, hua yejuatzi tiechpetlöhuasque para ma niese

* **5:3** Cuale nuyejque motradusirus: “siendo que totlaquentisque, ayec tiechpolus sente cuierpo”.

quiene ca tecate. Entunses tecselisque lo que tli tecmeresieroa por lo que tli otecchijque cuōc teyejyeya ipa ini nōnca cuierpo, cox otecchijque tlin cuale noso cox tlin amo cuale.

“Xomosentlölicö ca Deus”

¹¹ Por inu tetiemabelea Deus, hua tecmachelea inu mabelestle ipa toyulo cuōc tequennunutza giente para ma tequenxexicucö. Pero Deus tiechixomatihua cuale, hua neca seguro de que nemejua nuyejque nentiechixomate ipa nemoyulo quiene tecate de tonemeles.

¹² Amo nemiechelfea ini nōncate sōsantle para tochamöhuasque, tlöcamo nemiechmacatecate locör para nemomachelisque cuale de tejua, hua para cuale nenquennönquelisque inu ocseque giente tli quejtoa que yeca cuale tlöcatl tlö niese cuale noso caqueste cuale itlajtul, pero amo quejta pa iyulo.

¹³ Hua tlö giente quepensöroa que tecate quieme telucojte, pues icaca para Deus. Hua tlö tecpensöroa cuale hua amo telucojte, icaca para nemejua, para nemiechpaliebisque.

¹⁴ Pues tecmate que Cristo tiechtlasojtlalo, hua inu machestelestle *tiechchihualtea para ma tetequetecö solamente para yejuatzi. Pues tomaca cuenta de que sa sie tlöcatl omecoac por tonochtie, hua ejqueu tonochtie tecate quiename tlö ye otomezmejque.

¹⁵ Hua omecoac por tonochtie para que tejua tli tenentecate, tonemeles ma ayecmo iye para tejua,

* ^{5:14} Cuale nuyejque motradusirus: “tiechzacuelea para majcamo tochamöhuacö”.

tlöcamo ma iye para yejuatzi öque omecoac hua oyulebihuac por tejua.

¹⁶ Desde öxö ayecmo tecpensöroa de nionöque quiename ocseque gente quepensöroa. Hasta que tlö cachto otecponsöroöya de Cristo quiename ocseque quepensöroa, öxö ayecmo tecpensöroa ejqueu.

¹⁷ De manieras que tlö canajyeca ica tieca Cristo, ica sente tlöcatl yancuec. Inemeles tli primiero oyeya ye opanuc, hua öxö ye ica yancuec.

¹⁸ Noche inu quechihualo Deus. Hua yejuatzi otiechsentlölejque ca yejuatzi por medio de Cristo, hua otiechmacaque ini tequetl de tequensentlölisque tlöca ca yejuatzi.

¹⁹ Quejitusneque que Deus por medio de Cristo ye oquechejchijque lo nesesario para quensentlölisque noche tlöltecactlöca ca yejuatzi. Pos ayecmo quepoalo intlajtlacul tlöca. Hua tiechmacaque inu tlajtule de sentlölelestle.

²⁰ Ejqueu noso tecate terepresentöntes de Cristo. Icaca quiename tlö Deus mismo quentlötlajtilo tlöltecactlöca por medio de tejua. Tejua quiename terepresentöntes de Cristo tequentlötlajtea: “Xomosentlölicö ca Deus.

²¹ Cristo ayec otlajtlaculuc, pero Deus otiechibejque quiename tlö iloane tlajtlacultec. Oquechijque ejqueu por topampa, para ma teyecö teyecteque para ca Deus ipampa tecate tieca Cristo”.

6

¹ Bieno pues, tetejtequete tieca Deus, hua nemiechtlötlajtea nemejua: Ye nenqueselejque

tiefavur de Deus; amo xejcöhuaçö que cana amo quepeas iresultödo nemotech.

² Pues yejuatzi quejtulo:
Ipan tiempo cuale otemetzcac,
hua ipan tunale de nemöquextelestle otemetz-
paliebe.

Xejcaquecö cuale, que öxö ica tiempo cuale, öxö ica tunale de nemöquextelestle.

³ Amo tecchihua niontle tli canajyeca questorbörus, para ejqueu nionöque tlajtus amo cuale de inu tequetl tli tecchihua.

⁴ Cache, tecnejneque tequemejtetisque por noche lo que tli tecchihua que de melöhuac tecate tetietlatequepanojua de Deus. Por inu, tecxicoa ca meyac paciencia cuöc tecsojsufriroa, cuöc tiechpoloa canajyetla, cuöc totequepachoa por canajyetla,

⁵ cuöc giente tiechbejbiteque, cuöc tiechtzajtzacua ipan cörsel, cuöc meyac giente chöchalöne encuntra de tejua, cuöc toobligöroa para tetequetesque lalebes checöhuaç, cuöc amo tecojcoche hua hasta amo tetlajtlacua. Ca noche ini nönca sösantle tequemejtetea que de melöhuac tecate tetietlatequepanojua de Deus.

⁶ Nuyejque tequemejtetea por quiene tomalfea de tlajtlacule, por quiene tecate tetlajmatque, por que amo tecuajcualöne, por que tecualtientlöca, por que yejuatzi Espíritu Sönto iloac ca tejua, por que de melöhuac tequentlasojtla giente,

⁷ por que tetlanunutza lo que tli melöhuac, hua por que tecpejpea tiechecöhuales Deus. Por noche inu giente cuale quejtasque que tecate tetietlatequepanojua Deus. Tecusöroa örmas de yecteles-

tle *para tomagasque hua para todefendierusque hua totzacuelisque.

⁸ Paques giente tiechyectieniehua, paques tiechtlajyelejta, paques toca tlajtoa, hua paques tlajtoa cuale de tejua. Paques tiechtratöra quiename tlö teyene teistlacateneme, mös amo melöhuac, cache tequejtoa tlin melöhuac.

⁹ Tiechtratöra quiename tlö nionöque tiechixomatene, mös meyactie tiechixomate. Tiechtratöra quiename tlö ye temejmequene, pero cuale nenquejtasque que oc turavea tenentecate. Deus tiechcastecöruro, pero amo tiechmectilo.

¹⁰ Toyulcocoa, pero seme tepajpöctecate; tecate teporubejte, pero tequenricojtea meyactie. Niese que amo tecpea niontle, pero noche sösantle to-huöxca.

¹¹ ¡Ay tocnihua Corintios! Nemiechnunutza noche tli tecpejpensöroa; nemiechtla sojtla ca noche toyulo.

¹² Tlö cana polebe tlasojolestle hua confiönsa entre tejua hua nemejua, amo ica por topörte de tejua, tlöcamo nemejua nemiechpoloa tlasojolestle.

¹³ Xetiechcuepelicö inu tlasojolestle tli tejua nemiechpilea. Nemiechtlötlajtea quiename nennopelhua, nuyejque nemejua xetiechtlasojtlacö ca noche nemoyulo.

Tecate tetieteupa de Deus öque nemoateca

¹⁴ Amo xomosietelicö ca tli amo moneltoca. Pues tlö cana ejqueu nenquechihuasque, iyes quiename sente yunta que amo yabe de acuierdo.

* **6:7** Literalmente quejtoa: “ica tomöyecmö hua tomöarrabes”.

Pos ¿tli acuierdo quepeas yectelestle ca tlajtlacule? O noso ¿quiene yesque de acuierdo tlöbile ca tlajtlayohuaquelestle?

¹⁵ ¿Tli acuierdo quepeasque Cristo ca Beliar noso Amo Cuale Tlöcatl? Noso ¿quiene cuale quepeas pörte sente tli moneltoca ca sente tli amo moneltoca?

¹⁶ ¿Quiene iyes acuierdo entre tieteupa de Deus hua ixniehualojme? Porque tejua tecate tetieteupa de Deus öque nemoateca. Pos yejuatzi Deus oquejtojque ejqueu:

Nechöntes intzölö yejua;
neyajtenemes intzölö.
Hua neyes neinDeus,
hua yejua yesque nopuieblo.

¹⁷ Por inu:
Xequisacö de intzölö
hua xomoxelucö nencua, quejtulo Tlöcatzintle,
hua amo xecmötocabö inu tli petzoyutl.

Entunses naja nemiechselis,

¹⁸ hua neyes netajtle para nemejua
hua nemejua nenyesque notielpuchhua hua
noichpuchhua.

Ejqueu quejtulo Tlöcatzintle öque quepealo noche
checöhualestle.

7

¹ Deus tiechprometierfilo nöncate sösanle para
tejua, notlasojcöicnihua. Por inu ma tochepöhuacö
de noche sösanle tli quepetzoneloa tocuierto hua
toyulo, hua ca mabelestle de Deus ma toyectelicö
intiero cuale.

Pöbilo opajpöc de que omoyulcuejque Corintios

² ¡Xetiechselicö ipa nemoyulo! Nionöque amo otecchibelejque canajyetla amo cuale; nionöque amo tequixniempolojque, nimpor nionöque amo tejcajcyøjque.

³ Amo nequejtoa ini nönca para nemiechmömaltis, pues quiename ye onemiechelfe, ye onemiechselejque ipa toyulo. Ejqueu tejua hua nemejua seme teyesque sa secni, sea que temejmequesque o noso tenentasque.

⁴ Necpea meyac confiönsa ca nemejua; nomachelea cuale de nemejua. Nanimöroa lalebes, hua lalebes necpea meyac pöquelestle mös tec-sufrirojtecate meyac sösantle.

⁵ Pues nuyejque desde cuöc tonasecö necö Macedonia, amo mosiebiöya tocquierpo, pues on-huölajque sufrimientos de ca nobeyo. Tiehyehualoöya peleitos, hua ipa toyulo tomajtiöya.

⁶ Pero Deus, öque quemanimöruro tli modesanimöroa, yejuatzi tiechanimörojque cuöc onaseco Tito.

⁷ Hua amo solamente tanimörojque ipampa onhuöla Tito, tlöcamo nuyejque tanimörojque ipampa yaja manimöroöya ipampa nemejua cuale nenyabe. Hua yaja tiechpubele que lalebes nenquenejneque nenniechejtasque, hua que nemoyulcocoa, hua que nemotequepachoa lalebes por naja. Pos cuöc onejcac noche inu naja nepajpöqueya cache.

⁸ Pues naja necmate que onemiechyulcoco ca inu cörta tli nemiechtitlanele. Pero amo notlöocoltea. Primiero notlöocoltiöya ipampa onemiechyulcoco, pero sa por quiesque tiempo nemoyulcocoöya,

9 hua por inu öxö nepajpöque. Amo nepajpöque porque nocörta nemiechyulcoco, tlöcamo porque inu yulcocoolestle onemiechyulcuec. Pues one-miechmacac inu yulcocolestle tli quecualejtal o Deus, hua de inu maniera amo nemiechchibele tlin amo cuale cuöc nemiechyulcoco.

10 Pos inu yulcocoolestle tli quecualejtal o Deus quebicatz yulcuepelestle tli quebicatz nemöquextelestle. Por inu amo öque moquejörus de que omoyulcuec. Pero inu yulcocolestle tli yebitz de nönca tlöltecپactle quebicatz mequelestle.

11 Pero nemoyulcocoles de nemejua ica de inu tli quecualejtal o Deus. Pues xequejtacö quiene omochihuaco. Onenqueyecpensörojque inu asunto. Nenquesplicörojque lo que tli nenquechijque. Nemiechcualönte hua nemomajtejque. Nenquenejque nenniechejtasque, nemotequepachojoque por naja. Hua nenquecastecörojque öquenu oquechi amo cuale. Ca noche ini nönca sösantle cuale niese que nemejua amo nenquepea tlajtlacule ipa inu asunto.

12 Pos cuöc nemiechejcuelle inu cörta, amo tönto onequejcuelo para öquenu oquechi amo cuale, nimpot para öquenu oquechibele, tlöcamo cache onequejcuelo para nemejua, para ma xomamacacöcuenta delönte de Deus de quiene neniechtlasojtla hua nemotequepachoa por tejua.

13 Por inu tanimörojque.

Hua amo solamente tanimörojque, tlöcamo nuyejque tepajpöjque ipampa Tito pajpöqueya lalebes. Yaja pajpöqueya porque nemejua nenquescalejque iyulo.

14 Pos naja onetlajto cuale de nemejua ca Tito,

hua nemejua amo nenniechpinöjtejque ca lo que tli onequelfe. Pues quiename lo que tli tejua nemiechelfejque seme oyeya melöhuac, nuyejque lo que tli nequelfe Tito de nemejua nuyejque omochihuaco melöhuac.

¹⁵ Hua yaja Tito nemiechneque lalebes, hua quelnömeque de quiene nemejua nenquenelto-caque, hua nенqueselejque ca meyac mabelestle hua respieto.

¹⁶ Nepajpöque ipampa lalebes necpea confiönsa ca nemejua.

8

Ma tetietlööcolicö ca noche toyulo

¹ Öxö, tocnihua, tecneque ma xecmatecö quiene Deus oquenmacaque tiefavur ca inu grupos de creyentes necö ipa Macedonia.

² Pues mös yejua quepejpea meyac pruebas hua sufrimientos, pero yejua pajpöctecate lalebes. De inu maniera yejua oquemacaque meyac tomi para ma nequenbiquele para tocnihua tli cajcate ompa Judea. Ejqueu oquetiemacaque mösque lalebes porubejte cate.

³ Nemiechmelöjcöpubelea, que oquetiemacaque noche tli cuale yejua obejbeletiöya, hua hasta cache de lo que tli obejbeletiöya oquetiemacaque. Pues yejua mismo oquenejque oquetiemacaque ejqueu.

⁴ Hasta tiechtlötlajtiöya ma tequenchibelicö favur de que ma tequencöhuacö ma quepeacö pörte de nönca ofrienda para inu yecteque ompa pa Judea.

5 Hua oquechijque cache que lo que tli tejua tecpensöroöya, porque primieramente omotiemacaque yejua mismo ca toTlöatzintle hua nuyejque ca tejua, quiename quenequihua Deus.

6 Por inu tecanimörojque Tito, öque quepiehualte inu colecta de entre nemejua, ma nemiechpaliebe para nenquesencöhuasque inu tietlööcolelestle tli nenquetiemacasque.

7 Pues nemejua nenchecuaquisa ipa noche sösantle. Nenchecuaquisa ipa nemoneltoqueles, ipa nemotlajtul, ipa machestelestle, ipa nemocuejcuesebeles para nенquechihuasque tlin cuale, ipa inu tlasojtelestle tli tejua nemiechpilea. Ipa noche ini nöncate sösantle nenchecuaquisa; öxö noso xechecuaquisacö ipa ini nönca favur tli nенquechihuasque.

8 Cuöc nemiechelfea ini nönca amo nemiechmandörojteca para que ca fuiersa nенquechihuasque. Cache cuale nemiechelfea quiene cuejcuesebe ocseque para quechihuasque ini nönca, para que ejqueu necmates tlö de melöhuac nemejua nuyejque nенquepea tlasojtelestle.

9 Pos ye nенquemajmate de inu favur tli tiechchibelejque toTlöatzintle Jesucristo, que mös iloaya lalebes rico, pero por topampa onechihualuc porube. Ejqueu oquechijque para que tejua ma teyecö tericojte por tieporubejyu de yejuatzi.

10 Nequejtus ini nönca tli naja necpensöroa; que nemiechconbenieroa ma xecsencöhuacö lo que tli nенquepiehualtejque ipa ocsente xebetl tli opanuc. Pues nemejua cachto

nenquepiehualtejque amo solamente de
nenquechihuasque tlöcamo nuyejque de
nenquenequesque nenquechihuasque.

¹¹ Öxö noso xecscencöhuacö, para que
ejqueu quiename nencuejcuesebeya hua
nenquenequeya nenquechihuasque, öxö
nenquesencöhuasque noche tli nenbejbelete.

¹² Pos tlö de melöhuac yeca queneque
quetiemacas, Deus queselilo según lo que tli
quepea. Amo quetlajtlanelilo de öque lo que tli
amo quepea.

¹³ Amo nequejtoa ini nönca para que nemejua
nemiechpolus para ocseque quepeasque Meyac.
Cache necneque ma quepejpeacö iguöl yejua hua
nemejua.

¹⁴ Öxö nemejua nenquepejpea para nencax-
iltisque de lo que tli quenpoloa yejua. Cana-
jquiema beles nemiechpolus nemejua, hua yejua
caxiltisque de lo que tli nemiechpolus nemejua.
Ejqueu noso iyes iguöl.

¹⁵ Iyes quiename tlajcuelulpanca:
Öque quetocöro Meyac tlacuale amo oquesobrörö,
hua öque amo oquetocöro Meyac amo quepolo.

Tito hua icompanierojua

¹⁶ Pero netietlasojcömatelea Deus, ipampa yeju-
atzi quechihualtejque para ma motequepacho
Tito por nemejua, quiename naja notequepachoa.

¹⁷ Pues naja melöhuac nequelfe ma beya ca
nemejua, hua yaja otlaneltocac. Pero amo iya
porque naja onectitla, tlöcamo porque yaja mismo
lalebes queneque iyös ca nemejua.

18 Tiehua yaja tectitlantecate inu tocni öque creyentes de ca nobeyo queyectieniehua porque lalebes cuale tequete de tlanunutzas de inu cuale tlamachesteleste.

19 Hua nuyejque inu grupos de creyentes oquix-pejpenque ini nönca tocni para ma yajteneme ca tejua para tiechpaliebis ipa ini nönca tequetl tli tecchijtecate para tequenpaliebisque tocnihua. Pos tecnejneque que giente ma tiechamöhuacö Deus por lo que tli tecchijtecate, hua ma niese cuale que tecnejneque tetlapaliebisque.

20 Tecneque ma beya ini nönca tocni ca tejua, para que abele yeca toca tlajtus de ini nönca colecta tli tecchijtecate.

21 Pos tecnejneque ma niese cuale que lo que tli tecchijtecate tecchihua quiene conbenierebe. Tecneque ma quecualejtacö amo solamente Deus tlöcamo nuyejque giente.

22 Hua ca tiehua inu unteme, Tito hua inu oc-sente tocni, tectitlantecate ocsente tocni, öque ye meyac veces tecproböröjque que lalebes queneque quechihuas cualquier tequetl. Hua öxö cache queneque quechihuas inu encörgo de iyös ca nemejua, ipampa nemiechpilea meyac confiönsa.

23 Tlö canajyea tlajtlane öquenu yaja Tito, xequelficö que yaja nocompaniero de inu tequetl tli tecchihua para nemejua. Hua tlö tlajtlane de inu ocseque tocnihua, yejua cate tlatitlanme de inu grupos de creyentes, hua intech yejua niese tiecualnieteles Cristo.

24 Xequendemoströröficio nemotlasojteles, para ma quejtacö creyentes de ocseque locörte que tec-peaya arrasu cuöc tetlajtoöya cuale de nemejua.

9

Quiene ma mochihua inu ofrienda para yecteque

¹ Pero de inu tlapalieberestle tli tecchihua para tocnihua yecteque, amo necnesesitöra nemiechejcuelfis niontle.

² Pos ye necmate que nemejua nencate nenlistos para nentlapalieberisque. Hasta nemiechchamöhua inca tocnihua necö Macedonia, hua nequemelfea que nemejua de Acaya ye nemopreparörörojque desde ye sie xebetl. Hua meyactie de yejua majöprörörojque cache cuöc oquecajque de quiene nemejua nenyeya nenlistos.

³ Pero nequentitlanteca tocnihua ca nemejua para que majcamo cana resultörebes que amo melöhuac inu pörte de lo que tli cuale tli onequejto de nemejua. Necneque ma xeyecö preparödos, pos ye onequemelfe que nemejua nencate nen-preparödos.

⁴ Hua amo necneque ma canajyeca de Macedonia ma beya ca nemejua hua nemiechasetibe hua cana de repiente amo nenyesque nenpreparödos. Pos tlö ejqueu, nemejua nentiechpinöjtisque tejua ipampa lalebes nemiechpilea confiönsa (mösque cache nemejua nemopejpinöjtisque nemejua mismo).

⁵ Por inu nequejtaq que conbenierebe nequentlötlajtis tocnihua ma yöcö ca nemejua antes de que naja neyös, para nemiechpalieberisque para nenquesencöhuasque inu tietlöocoolestle que ye nenqueprometierojque. Pues tecneque ma iye listo cuöc tasetibe, hua ma iye sente

tietlöocolelestle tli yebitz desde nemoyulo. Amo tecnejneque ma iye quiename sente tlaxtlöibile tli yeca quetlaxtlöbis mösque amo queneque de melöhuac quetiemacas.

⁶ Pero nemiechelfis ini nönca: que öque tlatuca sa näjte xenöchtle, sa näjte quecosechörus. Pero öque tlatuca meyac, meyac quecosechörus.

⁷ Cöra sente de nemejua ma quetiemaca lo que tli ye oquepensöro ipa iyulo. Majcamo quetiemaca ca yulcocolestle, quiename tlö amo melöhuac queneque quetiemacas. Nimpor majcamo quetiemaca porque canajyeca quenelchibolis. Pos Deus quetlasojtlalo öque quetiemaca ca pöquelestle.

⁸ Hua Deus cuale nemiechmacasque noche tiefavur para que nemejua seme nenquepeasque noche tli monesositöra para noche sösantle tli nenquechihuasque. Hua ejqueu lalebes nenquechihuasque meyac de noche sösantle tlin cuale.

⁹ Pos ejqueu tlajcuelulpanca:

Oquecuajchayö, oquenmacac porubeje;
iyecteles iyes nochepa.

¹⁰ Hua Deus, öque quetiemacalo xenöchtle para ma motuca hua tlacuale para öque quecuös, yejuatzi nemiechmacasque meyac xenöchtle para nenquetucasque hua quemeyaquelisque inu frutos tli yebitz. Ejqueu quechihuasque ipampa nenquechihua lo que tli yectec.

¹¹ Hua Deus nemiechricojtisque de noche sösantle para que cuale nenquetiemacasque meyac. Hua de inu maniera tocnihua tietlasojcömatelesque Deus cuöc tequenbiquelea inu tietlöocolelestle.

12 Pos inu paliebelestle tli nenquechijtecate amo solamente caxiltea lo que tli quenpoloa inu yecteque, tlöcamo nuyejque quenchihualtea ma tietlasojcömatelicö Deus lalebes.

13 Pues yejua tieyectieniehuasque ipampa por ini nönca paliebelestle tli nenquechijtecate yejuzatzi quemejtetisque que melöhuac nemejua nenqueneltocatecate inu cuale tlamachestelestle de Cristo, quiename nenquejtoa que nenqueneltoca. Hua tieyectieniehuasque nuyejque ipampa nenquetiemacatecate meyac para yejua hua para noche ocseque gente.

14 De inu maniera motlajtlötlatjisque por nemejua, hua nemiechnequesque lalebes ipampa Deus nemiechmacaluc meyac tiefavur para nenquenpaliebisque.

15 ¡Ma tetietlasojcömatelicö Deus por inu bieye tietlööcolelestle tli tiechmacaque que abele teque-splicöroa!

10

Pöblo quepeaya checöhualestle por que oyeya tla-teotitlante

1 Öxö, naja mismo nePöblo nemiechtlötajtea por tieyectlasojteles hua tiepichaqueles de Cristo. Seque quejtoa que cuöc neca nemotzölö noportöra quiename nemöxo, pero que cuöc neca bejca de nemejua nomachelea nechecactec.

2 Nemiechtlötajtea noso que cuöc naja nemiechejtati amo xeniechchihualticö ma neya ca inu checöhualestle hua tlabielmetequelestle. Pos bel cuale netlabielmeques ca niecate tli

quepejpensöra que tejua sa teneme quiename tlöltecactlöca.

³ Pues melöhuac tejua tenentecate ipan tlöltecactle pero amo tomaga quiename momaga tlöltecactlöca.

⁴ Pos tejua amo tecusöra sösantle de tlöltecactle para tomagasque, tlöcamo tecusöra sösantle de tiechecöhuales Deus para tecxexetunisque lo que tli checöhua ica.

⁵ Ejqueu noso tecxexetunea tlanenebelesme hua noche ocseque sösantle tli ica encuntra de gente hua quentzacuelea para amo tieixomatesque Deus. Tequemajase noche pensamientos para ma tieneltozacö Cristo.

⁶ Hua tecate telistas para tequencastecörusque noche tli ayemo tlaneltocasque cuöc nemejua ye nentlaneltocasque cuale.

⁷ *Xomamacacö cuenta de ini nönca sösantle tli cuale niese. Tlö canajyeca momachelea yaja mismo que ica de Cristo, nuyejque ma momaca cuenta yaja mismo que tejua nuyejque tecate de Cristo de iguöl maniera que yaja ica.

⁸ Pues mösque nochamöhus oc tepetzi cache de lo que necnequesquea acerca de inu checöhualestle tli tecpejpea, amo nopejpinöjtis, porque ica melöhuac tli nequejitus. Pues toTlöcatzintle tiechmacaque inu checöhualestle para ma nemiechbepöhuacö hua amo para ma nemiechchibelicö döño.

⁹ Amo necneque ma niese que sa necneque nemiechmajtis lalebes ca nocörta, quiename seque

* **10:7** Cuale nuyejque motradusirus: “nemejua sa nenquejta lo que tli cuale niese”.

quejtoa que necchihua.

¹⁰ Pues yejua quejejtoa ejqueyi: “Icörtas de Pöblo lalebes checöhuac tlajtojtebitze, pero cuöc yebitz yaja amo checac tec ica, hua itlajtulhua amo tli cate”.

¹¹ Óque quejejtoa ini nönca ma quematecö que totlachihual cuöc ompa tecate ica iguöl ca tli tequejtoa ipa tocörtas cuöc amo ompa tecate.

¹² Pues tejua amo tanimöroa tecchihuasque quiename quechihua seque, tli mochamöhua yejua mismos. Hua motemachihua hua monenebelea ca sente medida tli yejua mismo oquechijque, hua ejqueu quechijtecate sente tuntojyutl.

¹³ Pero tejua amo tochamöhuasque *de que tecate cuale segün tiechelfea sente medida tli tejua mismo otecchijque. Cache tejua totemachihua ca sente medida tli Deus oquechechijque. Pos yejuatzi tiechelfejque tli tequetl tecchihuasque, hua yaja inu icaca medida ca tli totemachihua. Tlö tecchihua cuale inu tequetl, cuale tecate. Noso tlö amo tecchihua cuale, amo cuale tecate. Hua sie pörte de inu tequetl ica que ma tasecö hasta cöne nemejua nencate.

¹⁴ Pos tochamöhua ipampa tejua primiero tonaseto nemotlac ca inu cuale tlamache estelestle de Cristo. Tlö amo tonasene nemotlac entunses niesesquea que tochamöjtecate cache de lo que tli conbenierebe. Pero melöhuac otonaseto, hua por inu tochamöhuales moconformöroa ca tli conbenierebe.

* **10:13** Cuale nuyejque motradusirus: “de lo que Deus amo tiechelfejque ma tecchihuacö”.

15 Amo tochamöhua de lo que tli oquechi-jque ocseque tlöca, *pues tlö cana ejqueu tec-chihuane abele motemachihuasquiöne cuale tot-lachihual. Cache tecchea que nemobepöhuasque ipa nemoneltoqueles, hua ejqueu **tecpeasque cache meyac locör para tecchihuasque cache meyac de inu tequetl tli Deus tiechmacaque.

16 De inu maniera tecnejneque tetlanunutzasque de inu cuale tlamachestelestle ca ocseque locör cache bejca de cöne nemejua nencate. Tecnejneque tetlanunutzasque cöne ayemo tlajtlanunutza ocseque. Ejqueu amo tochamöhuasque de inu tequetl tli oquechi canajyeca ocsente cachto de que tejua tonasesquiöne.

17 Pero: “Öque mochamöhus, ma mochamöhuas solamente de toTlöcatzintle”.

18 Pos cuöc canajyeca moyectieniehua yaja mismo, amo quejtusneque que por inu ica cuale. Pero tlö queyectieniehualo Tlöcatzintle, entunses quiema cuale ica.

11

Pöblo mocomparöraa ca tlateotitlanme istlacateque

1 Ojalá ma xecxicucö mientras notuntojchihuas tepetzi. Pues xecxicucö.

* **10:15** Cuale nuyejque motradusirus: “tli amo tiechelfejque Deus ma tecchihuacö”. ** **10:15** Cuale nuyejque motradusirus: “tecpeasque cache meyac locör para tetequetesque entre nemejua, pero solamente quiename Deus tiechelfilo”, o noso “nentiechchamöhuasque lalebes, pero solamente quiename Deus quenequihua”.

² Pos nechöhuatejteca de nemejua quiename Deus nuyejque chöhuatiluteca de nemejua. Pues nemejua nencate quiename sente sisehuantu que hasta öxö momalfea. Hua naja ye nemiechcom-prometiero ca sa sie tlöcatl tli iloas nemonömec, que yejuatzi iloac Cristo.

³ Pero nomajtea de que yeca cuale nemiech-cajcayöhus ca istlacatlajtulme para que ejqueu ayecmo sa solamente Cristo nentietocasque hua ayecmo nenyesque sa de yejuatzi. Pues ejqueu inu cuhuötl oquec妖cayö Eva ca imöñas.

⁴ Pues cuöc canajyeca yebitz hua nemiech-nunutza ocseque sösantle acerca de Jesús tli tejua amo nemiechnunutzque, nemejua nencate listos para nенquexicusque. Hua cuöc yeca yebitz hua nemiechmaca ocsie espíritu, tli amo ica bel yejuatzi Espíritu Sönto öque cachto nentiesejejque, noso tlö nemiechmaca ocsie tlamachestelestle tli amo ica inu cuale tlamachestelestle tli ye nенquesejejque, nemejua nencate listos para nенquexicusque. Öxö pues xecxicucö mientras naja notuntojchihuas tepetzi.

⁵ Pues necpensöroa que inu *“super-apóstoles” tli yejua quejtoa que cate tlateotitlanme de primiera, amo niechpanabea nion tepetzi.

⁶ Beles noso notlajtulhua amo caultzetzi cate quiename intlajtulhua de yejua, pero de machestelestle necmate cuale. Pues ca noche tli tecchihua ye nemiechejtetejque inmixtla innochtie giente que tecmajmate cuale.

⁷ ¿Beles noso nенquepensöroa que netlajtlaco

* **11:5** Cuale nuyejque motradusirus: “tlateotitlanme tli cache importöntes cate”.

ipampa onemiechnunutz de inu cuale tlamach-estelestle tli Deus quetiemacalo, hua amo tli nemiechcobrörfe niontle? Pues naja quieme nopichaque para nemiechtlejcabis nemejua.

⁸ Hasta nequemönele insentöbo de ocseque grupos de creyentes, pues inu tomi tli niechhualtit-lanelejque onecsele para nemiechpaliebejtaya ca noteque.

⁹ Hua cuöc neyeya nemotzölö paques niechpoloöya, pero amo neyeya sente cörga para nionöque de nemejua, porque tocnihua tli ohuölajque de Macedonia niechmacaque lo que tli niechpoloöya. De inu maniera onectlachile para amo neyes sente cörga para nemejua. Hua oc turavea nectlachilejtas.

¹⁰ Nequejtoa lo que tli melöhuac tieixpa Cristo cuöc nequejtoa que nionöque niechcamatzacuas para ayecmo nochamöhuas de que ayec necsele tomi de nemejua por noteque ipa nemoestado de Acaya.

¹¹ ¿Tlica amo necselea? ¿Beles icaca porque amo nemiechtlasojtla? Deus quematihua que nemiechtlasojtla.

¹² Pero lo que tli pasörejteca icaca ini nönca; que niecate gente queselea tomi, hua quenejneque nuyejque naja ma necsele tomi, para ejqueu cuale mochamöhuasque de que cate quiename naja. Pero necsequirojas amo necselis tlaxtlöbile por noteque, para ejqueu amo nequenmacas locör para mochamöhuasque.

¹³ Pues niecate amo de melöhuac cate tlateotitlanme, cache tlacajcayöjeneme. Sa mochihua quiename tlö oyejyene tlateotitlanme de Cristo.

14 Pues majcamo tectietzömajtacö ini nönca, pues nuyejque inu Satanás mocuepa quiename sente öngel tli tlaniextea quiename tlöbile.

15 Ejqueu amo ica tietzöbetl tlö itlatequepano-jua Satanás nuyejque mocuepa para niesesque quiename tlatequepanojque de yectelestle. Pero intlamejyo iyes lo que tli quemeresieroa intlachi-hual.

Quiene oquesufriro Pöblo

16 Ocsajpa nequejtos: majcamo yeca quepensöro que neca netunto. Pero tlö ejqueu nenquepensörusque, pos xeniechcöhuacö ma nochamöhua tepetzi quiename sente tunto.

17 Tlö noyulchecöhuas para nequejtos ini nöncate sösantle amo netlajtlajtus quiename quenequihua toTlöcatzintle ma tlajtlajtucö giente, tlöcamo cache cuöc nochamöhuas netlajtlajtus quiename sente tunto.

18 Meyactie entre nemejua mochajchamöhua quiename tlöltecactlöca; naja nuyejque nochamöhuas.

19 Pos nemejua cuale nenquenxicoa tuntojte, ya que nele nemejua lalebes nentlajmatque nencate.

20 Hasta tlö canajyea nemiechase, noso tlö hasta tlö nemiechcua, tlö nemiechtzacua para que ayecmo neny esque nenlibres, tlö mochihua bieye hua hasta nemiechmaca pa nemoxöyac, nemejua nenquenxicoa hua nenquetlöcayeja inu tlöcatl.

21 Lalebes nepinöhua nequejtos, pero tejua amo tomachelejque techecachteque para nemiechchi-belisque inu sösantle.

Pero lo que tli yejua moyulchecöhua para quechihuasque, pos naja nuyejque noyulchecöhudas para necchihuas. (Xequelño mequecö que netlajtlajtojteca quiename sente tunto.)

²² Yejua, ¿cate hebreos? Naja nuyejque neca nehebreo. ¿Cate israelitas? Naja nuyejque. ¿Cate ipelhua Abraham? Naja nuyejque.

²³ ¿Cate tietlatequepano jua de Cristo? Naja cache neca que yejua. (Netlajtlajtojteca quiename sente luco.) Naja netequejteneme cache lalebes que yejua. Oniechtzajtzajque cache Meyac veces ipan cörseles. Lalebes Meyacpa niechbitejque giente, hua Meyac veces neyeya para nemeques.

²⁴ Möcuilpa inu joriojte niechmacaque inu castigo de que niechbitejque 39 veces.

²⁵ Yexpa niechbitejque ca cuabetl inu romanos, hua sajpa giente oniechtecaltejque. Yexpa opötzcalac börco cuöc naja ipa neyöya, hua sajpa nepanuc sie yohuale hua sie tunale ijtec lamör cuöc opötzcalac börco.

²⁶ Lalebes neyajteneme ca nobeyo, hua ye onopöntele ipa Meyac peligros: peligros de ötlacme cöne pano Meyac ötzintle, peligros de tlachtejque, peligros de nopaisönös joriojte, peligros de giente tli amo cate de nopuieblo. Onopöntele ipa peligros ca pa ciudades, peligros ca cöne nionöque chönnte, peligros ipa lamör, peligros intzölö tli mojtoa que cate tocnihua pero amo cate de melöhuac.

²⁷ Netequete ipa traböjo lalebes checöhucas. Meyac veces amo necoche. Neteosebe hua noömeque. Meyac veces amo netlacua. Necsufriroa itztec hua niechpoloa notzojtzomajua.

²⁸ Hua amo solamente inu, tlöcamo nuyejque

cara tunale necpea quiename tlamömale que notequepachoa lalebes por noche grupos de creyentes de ca nobeyo.

²⁹ Tlö canajyeca amo checactec ica, naja nuyejque nomachelea quiename yaja amo nechecactec. Tlö canajyeca quechihualtea ma betze ipa tlajtlacule, naja *nuyejque niechpinöhua.

³⁰ Tlö nenniechobligörusque para nochamöhus, ma nochamöjtä de ini sösantle tli quenierextea que amo nechecactec.

³¹ TieDeus de toTlöcatzintle Jesucristo, öque nuyejque iloac tieTajtzi, öque quepealo teochibelestle nochepa, yejuatzi quematihua que amo neistlacatlajtoa.

³² Cuöc naja neyeya ipa inu ciudad de Damasco ompa tlamandörojtaya sente cubernadur tli oquetlöle inu rey Aretas. Hua inu cubernadur oquetlöle guördias para ma quixuticö pobieltajte de inu ciudad para ma niechasecö.

³³ Pero tocnihua oniechtemobejque ijtec sente canösta ca pa bentöna de pa tepöntle, hua de inu maniera onemöquis de inu peligro.

12

Cochtiemequelesme hua panquextelesme

¹ Nenniechobligöra para nochamöhus, mösque inu chamöhualestle amo quepea proviecho. Bieno pues, ma netlajto de cochiemequelesme hua panquextelesme tli niechejtetejque toTlöcatzintle.

* ^{11:29} Cuale nuyejque motradusirus: “niechtlabielmectea”, noso “niechpinöhua hua niechtlabielmectea”.

² Ye quepea catorce xebetl que Deus niechtlej-cabejque hasta pa inu tercier elfecac. Amo necmate tlö oneya ca nocuierpo noso sin nocuierpo; solamente Deus quematihua.

³⁻⁴ Hua niechtlejcabejque hasta ipa Paraíso. (Ocasajpa ma nequejto que amo necmate tlö oneya ca nocuierpo o noso amo; solamente Deus quematihua.) Hua ipa Paraíso onejcac tlajtulme tli abele öque quejtus, tli amo mopermitiroa mojtusque.

⁵ Cuale necchamöhuasquea ocsente tlöcatl tlö yaja oquejtane ini nönca sösantle, pero amo nochamöhuas naja mismo de niontle tlöcamo solamente nochamöhuas de lo que tli quenixtea que amo nechecactec.

⁶ Pos mösque cana necnequesquiöne nochamöhuas de nöncate sösantle, amo necchihuasquiöne sente tuntojyutl, ipampa nequejtusquea lo que tli melöhuac. Pero amo nochamöhu de ini nönca sösantle, ipampa amo necneque ma yeca quepensöro que naja neca cache cuale que lo que tli quejta hua quecaque de naja.

⁷ Hua por que inu sösantle tli Cristo niechpan-quextelejque oyeya lalebes bieye, por inu, para que majcamo nochamöhu cache de lo que tli conbenierebe, niechmacaque sente tiecoco tli ica quiename sente estöcacuabetl tli tlölacoteca itech nocuierpo. Yaja inu tiecoco cualtitla Satanás para niechlatzcuepunelis. Hua Deus oquecöjque para majcamo nochamöhu cache de lo que tli conbenierebe.

⁸ Ca ini nönca yexpa netietlajtlane Tlöcatzintle ma niechcöhua ini tiecoco.

9 Pero yejuatzi niechelfejque: “Amo tecnesesitöra ocsente sösantle tlöcamo solamente no-favur tli temetzmacateca. Pues nochecöhuales yecniese intech tlöca tli amo checacteque cate”. Así es que öxö cache cuale nochamöhua ca meyac gusto de que amo neca nechecactec. Pos ejqueu tiechecöhuales Cristo icaca notech.

10 Por inu nepajpöque cuöc amo nechecactec, cuöc giente niechpöpöca, cuöc niechpoloa sösantle, cuöc giente niechtepottoca, noso cuöc necsufriroa canajyetla por Cristo. Pos cuöc amo nechecactec, cuöc inu cache nechecactec neca.

Pöbilo motequepachoöya lalebes por creyentes ipa Corinto

11 Bieno pues, ye onocuec quiename sente tunto. Pues nemejua onenniechobligöröjque ma necchihua. Conbenierebeya que nemejua nenniechyetcieniehuasquiöne, porque naja de niontle sösantle amo neca incuetlapa de *inu “super-apóstoles” tli yejua quejtoa que cate tlateotitlanme de primiera. Mös de melöhuac amo tli neca.

12 Cuöc naja netequejtaya entre nemejua, Deus se me quechihualutaya sösantle tli ica sieñas de öque ica tlateotitlantle. Pues quechihualoöya ti-etzöbetl hua sieñas hua ocseque sösantle bejbeye, mientras naja necxicojtaya meyac sösantle.

13 Nemejua amo nemiechtratöro quiename tlöneyene mienos que ocseque grupos de creyentes. Solamente amo onocö ma neye sente cörga para nemejua. ¡Xeniechperdonörucö inu fölta!

* **12:11** Cuale nuyejque motradusirus: “inu tlateotitlanme tli cache importöntes cate”.

14 Ye neca para neyös por yexpa ca nemejua. Hua cuöc naseti amo neyes sente cörga. Pues amo necneque niontle de lo que tli nemohuöxc; pues cache nemiechneque nemejua. Pues amo conbenierebe öque ipelhua ma quesentlölicö tomi para intötajua. Cache conbenierebe tötajte ma quesentlölicö para inpelhua.

15 Hua naja neca listo para nejcastörus notomi hua hasta naja mismo nocastörus hasta ma netlame por nemoyulo. Tlö naja ejqueu nemiechtla sojtlalalebes, ¿nemejua nenniechtla sojtlasque mienos?

16 Bieno pues, amo oneyeya sente cörga para nemejua, pero seque quejtoa que nele de porsi nemañuso, hua que ca nomöñas nemiechasec ijtec sente trömpa.

17 ¿Quie beles noso nemiechcajcajyö noso nemiechtlachtequele por medio de canajyeca de niecate tli nequentitla ca nemejua?

18 Nequelfe Tito para ma beya ca nemejua, hua ihua yaja inu ocsente tocni. ¿Quie beles nenquejtusque que Tito nemiechcajcajyö hua nemiechtlachtequele? Naja necmate que amo. ¿Amo teneme yaja hua naja sa de sie *maniera? ¿Amo otecchijque iguöl?

19 Beles nenquepensöroa que todefendierojetate delönte de nemejua, pero amo sa ejqueu ica. Cache tetlajtlajtojtecate tieixtla Deus ti etucöyupantzincó Cristo. Pero noche ini sösantle tequejtoa para nemejua, notla sojcöicnihua, para ma xomobepöhuacö de nemoneltoqueles.

* **12:18** Literalmente quejtoa: “espíritu”.

20 Pos nomajtea de que cuöc naja neyös nemotlac beles nemiechniextis que amo nenyesque quiename naja necnequesquiöne, hua de inu maniera necpeas que noportörus ca nemejua quiename nemejua amo nenquenequesque. Pos amo necnequesquiöne ma uye peleitos, chöhuatelestle, hua cualönelestle entre nemejua, nimpor ma xomonencuaxelucö entre nemejua, nimpor ma xequetucö tlajtulme amo cuale, hua ichtacatlajtulme. Nimpor amo necnequesquiöne ma xomochamöhuacö nemejua mismo, nimpor ma uye chöchalönelestle entre nemejua.

21 Ojalá majcamo niechchihualticö noDeus ma nepinöhua cuöc neyös ca nemejua, hua majcamo de repiente iye que nonchucas por meyactie de nemejua tli oc nentlajtlacojtecate hua ayemo nemoyulcuepa. Cache necneque ma xomoyulcuepacö para ayecmo nenquechihuasque petzoyutl hua ayecmo nentlajtlacusque ca sohuame tli amo cate nemosojsohuöhuö, hua ayecmo nemodedicörusque sa para nemopajpöctisque

13

Pöbilo nima iyös ca Corinto

1 Ye ica yexpa neyös ca nemejua. Tlö canajyeca quetieyelfisque, tecmatesque tlö melöhuac incamacopa de unte noso yete testigos tli oquejtaque tli oquechi.

2 Cuöc ca ujpa oneyeya ca nemejua, nequemelfe tli tlajtlacojtaya, hua ocsajpa nequemantesipörfea

yejua hua ocseque, que mös amo neca öxö ca nemejua, cuöc neyös amo möquisasque de incastigo.

³ Entunses nemomacasque cuenta que Cristo de melöhuac tlajtlajtulo por medio de naja. Pos nemejua nenquejtoa que nenqueneque sente prueba de que Cristo tlajtlajtulo por medio de naja. Bieno pues, cuöc neyös hua nemiechcastecörus, nemomacasque cuenta que quiema quechihualo, hua que amo tiepoloa checohualestle, tlöcamo checohualuteca entre nemejua.

⁴ Pues melöhuac tiecoruspelojque quiename tlö amo checactec iloane, pero nemoa por tiechecöhuales Deus. Hua tejua nuyejque amo techecakteque tecate quiename yejuatzi amo checactec iloaya, pero tieca yejuatzi tenentasque por tiechecöhuales Deus. Hua ca inu checohualestle teyösque ca nemejua.

⁵ Xomoprobörucö nemejua mismo para nennejnejtentece según lo que tli toneltoca. Nemejua mismo xomoprobörucö. Noso, ¿amo nenuemate que Jesucristo iloac *ipa nemoyulo? O noso solamente tlö cana nemoproböra de que amo nencate nencreyentes, entunses amo iloac ipa nemoyulo.

⁶ Pero necneque ma xomomacacö cuenta de que tejua cuale yeca tiechprobörus que de melöhuac tecate de yejuatzi.

⁷ Öxö totlötatlötatlajtea ca Deus por nemejua, para majcamo xecchihuacö tlin amo cuale. Amo tecchihua ipampa tecnejneque ma teniesecö cuale

* **13:5** Cuale nuyejque motradusirus: “nemotzölö”.

tejua, tlöcamo cache tecneque nemejua ma xecchihuacö quieme conbenierebe, mös ejqueu abele tecprobörusque que tecpejpea checöhualestle.

⁸ Porque abele tecchihuasque niontle tli ica encuntra de lo que tli melöhuac; solamente cuale tecchihuasque lo que tli ica de acuierdo ca lo que tlin melöhuac.

⁹ Por inu tepajpöque cuöc amo tecpejpea que tecusörusque tochecöhualas, porque quejtusneque que nemejua nenchecöjtecate de nemoneltoqueles. Totlajtlötlajtea por ini nönca, para que nenyesque cache hua cache cuale.

¹⁰ Por inu nemiechejcuelfea ini cörtä mientras ayemo neya ca nemejua para que cuöc naseti amo nemiechajajuas ca inu checöhualestle tli necpea. Pues toTlöcatzintle niechmacaluc inu checöhualestle para nemiechbepöhus, hua amo para nemiechxexetunis.

Tlajpalulestle

¹¹ Öxö, nocnihua, *xepajpöquecö. Xeyecö cache hua cache cuale. Xecpeacö tlapojpolfelestle ipa nemoyulo. Xeyecö sa de sie pensamiento. Xenemecö ca yecebielestle. Hua Deus, öque tiechtla-sojtlalo hua quetiemacalo yecebielestle, iloas ca nemejua.

¹² Xomotlajtlapalucö entre nemejua ca sente petzulestle de yectelestle.

¹³ Innochtie yectequ de necö nemiechtlapaloa.

¹⁴ ToTlöcatzintle Jesucristo ma nemiechmeyaquelicö tiefavur, hua Deus ma

* ^{13:11} Cuale nuyejque motradusirus: “adiós”.

nemiechpilicö tlasojtelestle, hua Espíritu Sönto ma
nemiecha compañörucö nemonochtie nemejua.

**El Nuevo Testamento en nahuatl de
Tetelcingo**
New Testament in Nahuatl, Tetelcingo
(MX:nhg:Nahuatl, Tetelcingo)

copyright © 1980 Wycliffe Bible Translators, Inc.

Language: Nahuatl, Tetelcingo

Translation by: Wycliffe Bible Translators, Inc.

Náhuatl, Tetelcingo [nhg], Mexico

Copyright Information

© 1980, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nahuatl, Tetelcingo

© 1980, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

03771ce6-e402-5a23-8b38-f25c82864faf